

# Kontuola

ANTZUOLA / Eguaztena / 2002ko martxoaren 27a / 107. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

## Aurtengo udal aurrekontua onartu zuten eguenean: denetara, 2.300.735 euro

AINTZANE IRIZAR

EAJ, EA eta Batasuna alderdien aldeko botoarekin onartu dituzte aurrekontuak. PSE-EEko Juan Benítez izan zen aurkako botoa eman zuen bakarra. 2.300.735 euroko aurrekontua onartu dute, eta 65.751 euro gehiagoko sarre-  
rak aurrez ikusi dituzte.

Joan den asteko eguenean, martxo osoko bilkuran, onartu zituzten 2002ko udal aurrekontuak. Bederatzi zinegotzik parte hartu zuen bozketan, eta bakarrak eman zuen aurkako botoa, PSE-EEko Juan Benítezek, hain zuzen. Benítezek adierazi zuen, bere ustez, herri bat gidatzea aurrekontua gestioatzea baino askoz gehiago dela: "Obrak egiten ari gara, baina herririk ez", gaineratu zuen. Bestalde, alkateari Udala gidatzeko autoritate morala ukatzen diola adierazi zuen.

EAJko ordezkari Jose Angel Zabalok, berriz, astebetean bost aurrekontu proposamen jaso dituztela salatu zuen, batetik bestera aldaketa nabarmenak dituztenak. Zabaloren ustez, horrek adierazten du fundamentu gutxi



Gizarte Etxeko lanendako aurrez ikusi dute inbertsiorik nabarmenena.

dagoela. Mireia Unamuno alkateak aldaketen berri eman, eta adierazi zuen aldaketa bakarra egon dela aurrekontuetan.

### SARRERAK, GASTUEN GAINETIK

2002ko aurrekontuetan, gastuak baino sarrera gehiago izatea aurrez ikusi du Udalak.

2.366.486,85 euroko sarrerak eta 2.300.735,22 euroko gastuak, hain justu, aurrez ikusi dituzte. Horrela, aurretik dagoen 65.751,14 euro

Aurrekontua batzordeka	
Giz. Ongizatea	434.885 €
Hezkuntza	76.084 €
Hirigintza	689.355 €
Komunit. Ongiz.	80.687 €
Kultura	358.104 €
Kirolak	101.253 €
Liburutegia	38.237 €
Euskara	39.262 €
Nekazaritza	103.631 €

Inbertsio nagusiak	
Gizarte Etxea	943.589 €
30 HGako urb.	142.846 €
Olaran urbaniz.	104.539 €
Antiguan urban.	69.116 €
Anbulator. berreg.	67.000 €

ko zorra estaliko litzateke. Bestetik, aipatzekoa da, ohi bezala, Hirigintza batzordeak izango duela aurrekontu handiena.

## HERRITARREN HITZA / Beñardo Kortabarria • Kazetaria

### Igerilekuarentzako zuloa

S an Joseko zubian Errioxan izan ginen lagun batzuk. Baina ez pentsa ohiko Bastida, Biasteri, Haro eta abar bisitatu genituenik. Oraingoan gure asmoa ez zen Errioxara sarri samar eraman gaituena izan. Egunkarian iragarkia irakurrita joan ginen hara, oporretarako balizko toki bat aurrez ikuskatzera. Badakizue, hobe sorpresarik ez izatea.

Cornagora joan ginen, Errioxa Beherera. Kokatzen laguntzeko, herri hori Nafarroak, Errioxak eta Soriak bat egiten duten inguruan kokatua dago, Fitero eta Arnedo artean, noizbait dinosauruak ibili ei

ziren mendietan. Parajea ezagutzen duenak jakingo du: basamortu hutsa da. Noizbaiteko erreken arrastoak badira han, baina errekarik ez; eta ikusi ahal izan genuen zuhaitz bakarrenetarikoa aterpe artifizial batean gordeta zuten, "zuhaitz fosilizatua" zioen kartelaren ondoan.

Cornago herria bera menditontor batean dago, gutxi gorabehera 760 metroko altueran. Herriak goialdean



"Umetatik askotan agindu izan zaizkigu igerilekuak"

sekulako -eta toki hartan, zentzugabeko- gaztelua du, iragan aberatsagoaren erakusgarri. Taberna pare bat badaude, baina, aurrez enkargatuta ez bada, bazkaltzeko tokirik ez. Jakina, goardia zibilaren kuartelilloa ere badago -fosilizatutako zuhaitzaren eboluzioa ikertzeko

beharbada-. Hango biztanleak 790en bat ei dira eta, nahi duzue sinistu!, sekulako igerileku publikoak dituzte.

Hau da, errespetu osoz esanda: herria kaka bat da, lau katu bizi dira, udaran urik apenas izaten dute... eta pizina publiko ederrak dituzte.

Antzuolako oraingo udalari gutxi gorabehera urtebeteko agintaldia geratzen zaio, nahikoa denbora umetatik askotan agindu izan zaizkigun igerilekuak errealitate bihurtzeko. Total, zulo bat eginda dagoenez, beste bat egin eta kitto! Baina oraingo honetan igerilekuak egiteko izan dadila! Horregatik bada, ez du inporteta -behintzat niri ez- urte batzuetarako hipotekatuta geratzea.

## LABUR

### Arrolak batzar orokorra egin zuen eguaztenean

Joan den asteko eguaztenean egin zuen Arrola mendi taldeak urteko batzar orokorra.

Aurreko urteko balantzea eta aurtengorako asmoak aztertzeaz gain, batzarkide berriak aukeratzeko asmoa zuten. Bost batzarkidek lagako dute kargua Aste Santu ostean. Oraingoan, baina, batzarkide bakarra sartu da, Maria Dolores Arbulu. Orain, beste lau kideren beharrendaude Arrola elkarteak; nahi duenak zabalik dituzte atekak batzarkide izateko.

## IRAKURLIAREN TXOKUA

### PINTADAK HERRIKO HORMETAN

Antzuolan azaldutako pintaden gainean gure iritzia plazaratu nahi dugu:

1) Protestatzeko badaude arrazoiak: Garzonen atxiloketa eta ilegalizazioak ez dira tontokeri bat eta ulertzekoa da afektatuta daudenen amorrua.


2) Denok ez dute/dugu iritzia komunikatzeko aukera berdina, beraz, ez gauden medio *extraofizialak* erabiltzearen aurka.

3) Medio *extraofizial* horien erabilerak hainbat irizpide kontuan izan behar ditu: kalte ekonomiko edo estetiko gutxien eragingo duten moduak erabiltzea; herritarrak ahalik eta gutxien molestatzeko; bestelako efektuak aurrikusi eta ekiten saiatzea. Ez da berdinean egun batzuetara kendu daitezkeen paperak ipintzea edo harrizko etxe bat pintatzea. Zentzu honetan, pintaden egileen salaketa-helburua agian beteko zen, baina ebitatu zitekeen efektu negatiboa eragin dute: herritar asko haserretu da, eta horrela ezin da herritarrengandik ulermen eta el-kartasun handiagoa lortu. Gainera, pintada gutxiagorekin berdinean adierazi zitekeen esan nahi zena, ordu-an, zergatik hainbeste? Ba-dakigu neurri eta balorazio kontuak subjektiboak direla; esan nahi duguna da balore positiboa dela norbere eskubideak gauzatzeko besteak ere nolabait kontuan hartu eta ahalik eta modu onenean biak konbinatzea. Pintadetak tiro-dianak tokiz kanpo daude, ez dute informatzeko ezta salatzeko helbururik. Garzonen erabakiekin ados ez gauden bezala, dianekin egindako mehatxuen kontra gaude.

4) Bestalde, uste dugu irtenbide aproposena pintadak Udalak ezabatzea dela.

ANTZUOLAKO ZUTIK

## KIROLA



### Asier Muxika irabazle Uzarragan

Uzarragako Igoeraren 28. aldia jokatu zuten domeka goizean gazte mailako txirrindulariek. Muebles Ordizia taldeko Asier Muxika txirrindulariak irabazi zuen domekako proba, eta talde horrek berak eraman zuen taldekako lehen saria ere. Lasterketa gogorra izan zen, eta lasterketa 116 txirrindularik hasi zuten arren, 65ek besterik ezin izan zuten bukatu./A.I.

### Antzuolako atletak fin ibili ziren Oñatiko duatloian zapatuan

Zapatuan Oñatin jokaturako duatlo lasterketan emaitza onak lortu zituzten Antzuolako atletak.

Aitor Larrea zortzigarren sailkatu zen, orubete, 48 minutu eta 18 segundoko denborarekin, irabazlearengandik minutu bat eta 54 segundora. Iker Larrea hamalagarren, 1:49:12ko denborarekin; Aitor Peñagarikano, berriz, Ikerrengandik bost segundora sartu zen, 15. postuan.

### Euskal Pirinioetara joateko irteera antolatu du Arrolak

Apirilaren 13an eta 14an, euskal Pirinioetara joateko irteera antolatu du Arrolak, Linzara, hain zuzen. Joan nahi dutenek apirilaren 3an edo 9an eman beharko dute izena Arrolaren egoitzan, 19:00etatik 20:00etara.

## EMAITZAK

### FUTBOLA

Antzuola 3 Orioko 2 (Gazteak)

Landetxa 1 Antzuola 3 (Kadeteak)

### PILOTA

Udaberri Saria

Bergara-Olalde (eskuz kad.) . . . 13-22

Zumarraga-Olalde (eskuz nag.) . 22-16

Hernani-Olalde (paletaz) . . . . . 27-35

Gipuzkoako Txapelketa

Gazteleku-Olalde (infantilak) . . 15-18

### Agirre eta Biteri txapelkunorde Udaberri Sarian

Joan den zapatuan jokatu zuten Olalde pilota elkartereko Agirrek eta Biterik Udaberri Sariko finala, Zumarragako bikotearen aurka. Txapelketa bikaina egin dute, baina ezin izan ziren finalean gailendu; 16-22 galdu zuten.

## BOTEPRONTOAN/ Aritz Berraondo · Pilotaria

*“Egubakoitzeko partidura gogotsu joan nintzen; argi neukan ahal nuen guztia eman behar nuela”*

Joan den egubakoitzean jokatu zuen Berraondok eskuz banakako txapelketako lehen partidua. 22-4 galdu zuen Esainen aurka. Bigarren partidua apirilaren 28an jokatu du, Xabier Imazen aurka; partidu hori irabaziko ez balu, bigarren mailara jaitsiko litzateke.

**Zure helburu nagusia mailaz ez jaistea zela adierazi zenuen. Hurrengo partidua, hortaz, derrigorrez irabazi beharrekoa duzu.**

Bai, horixe zen nire helburu nagusia, lehen partidua irabazi eta lehen mailan jarraitzea. Baina Esainen aurka lehen partidua galdu ondoren, asko korapilatatu zaizkit gauzak.

**Eskuak oso ondo ez zenituela adierazi zenuen. Horrek izan du eraginik?**

Ez. Egubakoitzeko partidura gogotsu joan nintzen; argi neukan ahal nuen guztia eman behar nuela. Egia da eskuak ez neuzkala oso ondo, baina hori ez zen partidua galtzeko arrazoi izan.

**Emaitzari begiratuta aldea nabarmena da; zein izan zen emaitza horren arrazoiak?**

Iñaki Esainek oso partidu ona egin zuen, eta esan ohi den moduan, txapelkun handi baten moduan irabazi zuen partidua. Erritmo bizia ezarri zion partiduari Esainek, eta nik ezin izan nion erritmo horri eutsi. Sekulako pilotadak eman zituen, eta horrela irabazi



zidan partidua.

**Bigarren mailako txapelketa izan zinen iaz. Horrek eragin dizu presiorik?**

Ez, ez dut uste presiorik eragin didanik horrek; oso ezberdina da lehen mailan edo bigarren mailan jokatzeko.

**Hurrengo partiduan, beharbada, sentituko duzu presioa; izan ere, bigarren mailara jaisteko arriskua hor dago.**

Ez dut uste presiorik sentituko dudarik, baina urduritasuna bai. Askok jokatzen dut partidu horretan, eta urduri egongo naizela uste dut. Sekula ez dut Imazen aurka jokatu, baina lehengoan Patxi Ruizen aurka jokatu zuen partidua ikusita, ez da aurkari erraza izango Xabier Imaz.

Igor eta Txomin



Margoak  
orokorrean

ANTZUOLA  
609 157 131

BERGARA  
609 150 164

LARREA

TABERNA

Kalebarren 17  
ANTZUOLA

Tomas Gezalaza

Apainketarako eta  
industriarako pinturak

Paper margoak

Moketak eta tapizatuak

Kalegoi 21  
Tf. eta faxa 943 76 64 07  
Poltsikokoa 616 277 999  
ANTZUOLA / BERGARA

GAILUR

taberna eta  
gozotegia

Buztinzuri 13 ANTZUOLA  
Tf. 943 78 70 32

Tomas Gezalaza

Zoruen kutxilatua  
eta  
barnizaketa

Kalegoi 21  
Tf. eta faxa 943 76 64 07  
Poltsikokoa 616 277 999  
ANTZUOLA / BERGARA